

ZENIČKO-DOBOJSKI KANTON

# Budžet za građane 2017.



## Zašto „Budžet za građane“

Dragi građani,

Pred vama je novi „Budžet za građane“ – građanski vodič koji na jednostavan način prikazuje kako se planira prikupljati i trošiti novac iz budžeta Zeničko-dobojskog kantona tokom 2017. godine. Na ovaj način nastavljamo unapređivanje otvorenog i odgovornog odnosa sa građanima u procesima donošenja važnih odluka na kantonalnom nivou.


„Budžet za građane“ ima za cilj da javnosti omogući bolji uvid i razumijevanje načina na koji vlasti vašeg Kantona planiraju, raspodjeljuju i troše sredstva iz budžeta. S obzirom na to da u budžet Kantona novac stiže od poreznih obveznika, naša je obaveza da njime raspoložemo u najboljem interesu zajednice i da građanima predstavimo tačne i razumljive podatke o izvorima prikupljenih prihoda i njihovom trošenju.

Ovaj sažeti vodič kroz Budžet namijenjen je svim građanima koji žele da budu obaviješteni o planovima Vlade za prikupljanje i trošenje novca i da prate realizaciju postavljenih ciljeva.

Ovom prilikom zahvaljujem svim građanima koji su doprinijeli da „Budžet za građane“ učinimo što boljim. Takođe, veliku zahvalnost dugujem ministru finansija, gospodinu Andreju Kajiću, i pomoćnici ministra za trezor, gospođi Nadi Delibašić, koja je bila i koordinator u čitavom projektu.

Nadamo se da će ovaj dokument objasniti ključna pitanja i tako Budžet učiniti pristupačnijim i razumljivijim. Očekujemo da ćete se i u narednim godinama više uključivati u budžetski proces, što će doprinijeti novom kvalitetu upravljanja Zeničko-dobojskim kantonom.

# O Budžetu za građane



Novac kojim raspoložu institucije vlasti na svim nivoima u svojim **budžetima** je novac građana. Prihodi vlasti dolaze od građana kroz poreze (na prodaju roba i usluga, dohodak, plaće, imovinu...) i plaćanje raznih taksi i naknada. Pored ovoga, prihodi dolaze od **koncesija** za iskorištavanje prirodnih resursa koji su dio nacionalne baštine pa pripadaju svim građanima. Takođe, treba pomenuti da jedan dio prihoda dolazi i od naknada zagađivača za zaštitu okoliša. Čak i kada prihodi dolaze od kredita, građani su ti koji će ih morati otplatiti na kraju. Institucije vlasti su odgovorne za sredstva iz budžeta, te odlučuju u ime građana o raspodjeli prikupljenih sredstava za različite namjene.

Imajući u vidu da je Budžet i odraz lokalnih **javnih politika**, jasno je zbog čega u zemljama sa razvijenom demokratskom kulturom postoji značajan interes javnosti za mnoga pitanja koja se tiču Budžeta. Građani žele da znaju i odlučuju o tome kako će se trošiti njihov novac. Pri tome je osnovni preduslov za učešće građana u procesu odlučivanja o Budžetu njihova informisanost. U skladu s tim, zadatak organa vlasti jeste da obezbijedi javnost rada i pruži informacije o svim bitnim pitanjima u procesu kreiranja, usvajanja i izvršavanja Budžeta.

**Budžet za građane** je dokument koji sažima i pojašnjava osnovne informacije iz Budžeta. To je izvještaj za građane, predstavljen u pristupačnom formatu, koristi jednostavan i jasan jezik koji oni mogu razumjeti. Ako su u stanju da razumiju, građani onda mogu ostvarivati svoja građanska prava u demokratiji – oni mogu postavljati pitanja koja osiguravaju da vlast objašnjava ono šta radi u njihovo ime.

**Budžet** – Akt kojim se predviđa-ju svi prihodi i rashodi u jednoj budžetskoj godini.

**Koncesija** – Odobrenje nadležnog organa koje se daje fizičkim ili pravnim licima za obavljanje određene djelatnosti, ili korištenje određenih resursa, u skladu sa propisanim uslovima.

**Javne politike** – Plan ili smjer djelovanja vlasti.

**Budžet za građane** je pojednostavljen i ilustrativan prikaz određenih dijelova Budžeta.

Treba napomenuti da je sadržaj ovog dokumenta pripremljen u potpunosti uz učešće velikog broja građana Zeničko-dobojskog kantona. Tokom pripreme samog dokumenta izvršene su brojne individualne i grupne konsultacije sa građanima, predstavnicima Grada Zenice i općina, te predstavnicima nevladinih organizacija.

## Ko finansira pojedine nadležnosti?

Zeničko-dobojski kanton obavlja poslove iz vlastite ustavne nadležnosti, podijeljene nadležnosti između Federacije BiH i Kantona i nadležnosti koje su mu prenesene posebnim zakonima Federacije Bosne i Hercegovine. Stoga je veoma bitno razumjeti koje nadležnosti i poslove finansira Kanton i u kojoj mjeri to čini. (Tabela 1)




Tabela 1: Finansiranje nadležnosti (zakonska obaveza i dobrovoljno finansiranje, u skladu sa opredjeljenjem kantonalne politike)

	Potpuno finansira Kanton	U većoj mjeri finansira Kanton	U manjoj mjeri finansira Kanton
Javna uprava (kantonalna)	X		
Pravosuđe	X		
Policija (kantonalna)	X		
Civilna zaštita (kantonalna)		X	
Predškolsko obrazovanje			X
Osnovno obrazovanje	X		
Srednjoškolsko obrazovanje	X		
Visoko obrazovanje	X		
Obrazovanje odraslih	X		
Socijalna zaštita		X	
Bolnice/domovi zdravlja			X
Specijalni zavodi u zdravstvu		X	
Kultura, fizička kultura i sport		X	
Urbanizam, prostorno uređenje i stambena politika			X
Komunalne i druge javne uslužne djelatnosti			X
Zaštita okoline		X	
Saobraćaj i transport			X
Poljoprivreda		X	
Vodoprivreda		X	
Šumarstvo		X	
Privreda		X	
Zapošljavanje			X
Informisanje			X

# Kako teče budžetski proces?

**Budžetski proces –** Proces koji obuhvata sve korake pri kreiranju i usvajanju Budžeta.

**Budžetski proces** se zasniva na analizi ostvarenja prihoda u proteklom periodu, procjenama ekonomskih kretanja, prioritarnim ciljevima i poslovima iz nadležnosti Kantona, planiranim projektima i programima. Donošenje Budžeta Kantona propisano je Zakonom o budžetima u FBiH, kojim su utvrđeni postupci/koraci i krajnji rokovi u pripremanju, izradi i usvajanju Budžeta.


Aktivnosti započinju u 6. mjesecu, pripremom i analizom **DOB**-a za Zeničko-dobojski kanton, te slanjem Uputstva (Instrukcije) za izradu Budžeta budžetskim korisnicima. Na osnovu budžetskih zahtjeva korisnika budžeta Kantona, Ministarstvo finansija vrši usaglašavanja te pristupa izradi Nacrta Budžeta. Nacrt Budžeta utvrđuje Vlada, a prihvata ga Skupština Kantona, nakon čega slijede javne rasprave o Nacrtu. Poslije provedenih javnih rasprava, Skupština razmatra Prijedlog Budžeta i donosi Budžet. Aktivnosti na donošenju Budžeta za narednu godinu uglavnom traju do 31.12. tekuće godine. Donesena budžetska dokumenta se objavljuju. Ukoliko se do 31.12. tekuće godine ne donese Budžet, donosi se Odluka o privremenom finansiranju za prva 3 mjeseca godine za koju se donosi Budžet.

**DOB –** Dokument Okvirnog Budžeta je akt koji sadrži makroekonomske projekcije i prognoze priliva i odliva budžetskih sredstava za naredne tri godine, a na kom se zasniva priprema i izrada godišnjeg Budžeta.

U tekućoj godini planirani budžetski okvir se realizuje, a raspoloživa sredstva se troše prema utvrđenim namjenama i programu, o čemu se Vlada izvještava kvartalno, polugodišnje i godišnje, a Skupština Kantona godišnje. Ostvarenje Budžeta se analizira, nadzire i prati, a u slučaju odstupanja, vrše se izmjene Budžeta po istoj zakonskoj proceduri. Ured za reviziju institucija u FBiH vrši kontrolu i **reviziju izvršavanja** Budžeta i izvještavanja. Slijedi grafički prikaz budžetskog ciklusa.

**Revizija –** postupak ispitivanja tačnosti, potpunosti, vjerodostojnosti, zakonitosti i objektivnosti.

Grafikon 1: Budžetski ciklus sa naglaskom na mjesec kada se građani mogu uključiti (polja označena plavom bojom) i kako to mogu da učine.



# Opći (makroekonomski) okvir za donošenje Budžeta

**Makroekonomski okvir** – Odnosi se na funkcionisanje i upravljanje cjelokupnom ekonomijom.

Posljednji raspoloživi podaci za 2016. godinu nagovještavaju poboljšanje ekonomskih aktivnosti i jačanje ekonomskog rasta u zemljama EU u odnosu na prethodnu godinu. To predstavlja glavnu odrednicu za kretanja industrijske proizvodnje u BiH. Tokom 2017. godine očekuje se da će pozitivniji ambijent u međunarodnom ekonomskom okruženju, praćen stabilizacijom u sektoru za proizvodnju električne energije, omogućiti postepeni oporavak industrijske proizvodnje u Bosni i Hercegovini i nastavak trenda pozitivnog ekonomskog rasta koji će biti potpomognut i jačanjem investicija.

U proteklom periodu pozitivna makroekonomska dešavanja su dovela do povoljnijeg vanjskog okruženja, prestanka pada investicija i postepenog rasta zaposlenosti. Takođe, višegodišnji realni rast izvoza je bio 5% u prosjeku. Zbog toga se sada očekuje da će ekonomski rast u 2016. godini biti nešto brži u odnosu na 2015. godinu sa realnom stopom od 3,2%. Nakon toga, u 2017. godini se očekuje dodatno ubrzanje sa stopom od 3,5%.

Dosljedno i pravovremeno sprovođenje „Reformske agende“ trebalo bi da omogući poboljšanje poslovanja preduzeća što će rezultirati povećanjem investicija i obima proizvodnje u okviru prerađivačke industrije.

Pored prerađivačke industrije, tokom 2016. godine očekuje se i značajniji doprinos energetskeg sektora, koji čini 1/3 ukupne industrijske proizvodnje u Bosni i Hercegovini. Pod pretpostavkom nastavka pozitivnog trenda u vanjskom okruženju uz dodatni doprinos unutrašnjih dešavanja tokom 2016. godine, u Bosni i Hercegovini se može očekivati solidan rast industrijske proizvodnje od oko 4%. Takođe, očekuje se da energetskeg sektor nastavi pozitivan trend rasta proizvodnje i dodatno osnaži industrijsku proizvodnju.

Prema projekcijama Direkcije za ekonomsko planiranje Bosne i Hercegovine (DEP), ovo bi trebalo rezultirati godišnjim povećanjem industrijske proizvodnje od preko 5% za svaku godinu.

Projekcija prihoda u 2016. godini je zasnovana na projektovanim relevantnim makroekonomskim pokazateljima za navedeni period, **sezonskoj šemi naplate** i projekcijama pojedinih kategorija prihoda za 2015. godinu, te efektima izmjena politika u oblasti carina i akciza na duhan. Zakon o porezu na dohodak („Službene novine Federacije BiH“, broj: 10/08, 9/10, 44/11, 7/13 i 65/13), koji je u primjeni od 01.01.2009. godine, donio je pozitivne efekte u oblasti direktnog oporezivanja, zamjenivši niz drugih poreza koje su plaćali građani. On uključuje oporezivanje dohotka od nesamostalne i samostalne djelatnosti, dohotka od imovine i imovinskih prava, od ulaganja kapitala, te od dobitaka ostvarenih sudjelovanjem u nagradnim igrama i igrama na sreću. Porez na dohodak je prihod koji pripada kantonalnim i općinskim budžetima, tako da 65,54% pripada kantonalnom budžetu, a općinama minimalno 34,46%.

**Sezonska šema naplate** – Procjena naplate prihoda korigovana za uobičajene promjene pojedinih prihoda tokom određenih perioda u godini.


**Indirektni porezi** – Uvozne i izvozne carine, akcize, porez na dodatnu vrijednost i svi drugi porezi obračunati na robu i usluge, uključujući poreze na promet i putarine.

Pored prihoda od **indirektnih poreza**, u skladu sa Zakonom o pripadnosti javnih prihoda u Federaciji BiH, prikupljaju se i drugi porezi, koji uključuju porez na dobit pravnih lica, porez na dohodak, poreze na imovinu i ostale poreze.

Na kraju, treba napomenuti da se Budžet Kantona u potpunosti oslanja na ove makroekonomske pokazatelje i projekcije imajući u vidu propise na osnovu kojih se vrši raspodjela određenih poreznih i neporeznih prihoda. Za skoro većinu poreznih i neporeznih prihoda su definisana pravila njihove raspodjele za određene nivoe vlasti (država–entitet–kanton–grad/općina).

# Kako se puni budžet

## Zeničko-dobojskog kantona?



Budući da se nastavlja ekonomska kriza, pojedini budžetski prihodi stagniraju, što uslovljava planiranje Budžeta u prethodno definisanom okviru. U skladu sa propisanim kriterijumima raspodjele, prihodi po osnovu poreza u 2017. se neće smanjivati već su planirani na skoro istom nivou kao i za 2016. godinu.

Budžet Zeničko-dobojskog kantona se najvećim dijelom puni iz poreznih prihoda, koji se dijele između različitih nivoa vlasti (PDV, porez na dohodak, te određene naknade i **transfer**), a koji čine skoro 80% budžeta. Na ove prihode Kanton ne može značajno uticati.

**Transfer –** Doznaka sredstava sa jednog na drugi račun, najčešće sa jednog na drugi nivo vlasti.


Kada posmatramo neporezne prihode, vidimo da su najznačajniji sljedeći prihodi:

- Prihodi od poduzetničke aktivnosti i imovine – 232.323 KM;
- Kantonalne sudske takse – 5.170.00 KM;
- Novčane kazne i ostali prihodi – 4.840.100 KM;
- Kantonalne administrativne takse – 926.000 KM.

## Gdje se raspoređuje budžetski novac ?

Prioriteti u potrošnji za 2017. godinu su i dalje stabilizacija budžeta i izdvajanje za obrazovanje, policiju i pravosuđe (u najvećoj mjeri na plaće zaposlenih), otplatu po osnovu zaduženja, socijalnu zaštitu, te **tekući i kapitalni izdaci** za koje su Vladinim dokumentima utvrđeni prioriteti finansiranja.

### GDJE SE RASPOREĐUJE BUDŽETSKI NOVAC?



Kada posmatramo strukturu budžetske potrošnje, vidljivo je da se u 2017. godini najviše sredstava namjerava izdvojiti za rashode plaća i nadoknada troškova za zaposlene (uključujući i doprinose), što je 56,69% od ukupno predviđenih rashoda (292.908.000 KM) za 8.322 zaposlenih u kantonalnim institucijama. Ovdje spadaju plaće za zaposlene u Vladi i njenim ministarstvima, upravama i službama, policiji, obrazovanju, pravosuđu, te ostalim institucijama kojima je Kanton osnivač. Treba napomenuti da se za materijal i usluge svih ovih navedenih institucija planira izdvojiti 10,70% od ukupnih rashoda.

U sklopu tekućih transfera, za šta se planira izdvojiti 21,82% ukupnih rashoda, najvažniji se odnose na:

- Tekuće transfere pojedincima (stipendije, socijalna pomoć, pomoć pri zapošljavanju, pomoć za stanovanje, itd.) – 37.805.774 KM;
- Tekući transferi drugim nivoima vlasti (primarno Gradu Zenici i općinama) – 11.253.030 KM;
- Tekući transferi neprofitnim organizacijama – 1.839.800 KM;
- **Subvencije** javnim preduzećima – 10.294.500 KM;
- Subvencije privatnim preduzećima i poduzetnicima – 1.470.000.


**Subvencije –**  
Tekući transferi koji predstavljaju bespovratnu pomoć pravnim ili fizičkim licima uslovljenu posebnom vrstom djelatnosti ili statusom primaoca.

**Budžetska rezerva –** Novčana sredstva koja se u budžetu izdvajaju za hitne i neplanirane situacije.

Tekuća **budžetska rezerva** iznosi 0,02% predviđenih rashoda.

Struktura potrošnje se može posmatrati i po oblastima tj. namjeni/funkciji utroška predviđenih sredstava.

Na sljedećem grafikonu se vidi potrošnja po oblastima, sa namjenskim doznakama od ostalih nivoa vlasti.




U toku 2017. godine, najviše se planira izdvojiti za oblast obrazovanja (osnovno, srednjoškolsko i visoko obrazovanje) 126.906.591 KM i oblast javnog reda i sigurnosti (65.553.728 KM). U okviru ove dvije oblasti zaposleno je preko 7.000 osoba koje plaću primaju iz kantonalnog budžeta. Za socijalnu zaštitu se planira izdvajanje od oko 35.646.700 KM.



# Izvršenje budžeta


Vidljivo je da su rashodi u 2017. godini planirani na nešto višem nivou (292.908.000 KM) u odnosu na plan za 2016. godinu (285.225.000 KM). Na grafikonu se vidi da je zabilježen trend rasta rashoda gledajući od 2013. godine.



# Obrazovanje

Najveći dio budžeta, 43,33% ili 126.906.591 KM, i dalje se planira izdvojiti za funkcionisanje obrazovnog sistema u Zeničko-dobojskom kantonu.

S tim u vezi treba napomenuti da se najviše planira izdvojiti za potrebe funkcionisanja osnovnog obrazovanja (67.421.244 KM) i srednjoškolskog obrazovanja (37.362.336 KM). Za potrebe visokog obrazovanja se planira izdvojiti 14.564.637 KM, dok se za ostale troškove obrazovanja (uključujući transfere i pomoći) planira izdvojiti 7.558.940 KM.




Udio obrazovanja u Budžetu za 2017.

Struktura izdvajanja za obrazovanje





## Podrška zapošljavanju i privatnom sektoru

Vlada Zeničko-dobojskog kantona i dalje namjerava realizovati programe i projekte u cilju pružanja podrške zapošljavanju i razvoju privatnih preduzeća i preduzetnika. Za te namjene je predviđeno 5,91% od ukupno planiranih tekućih transfera.





Treba napomenuti da je u 2017. godini Budžetom Zeničko-dobojskog kantona predviđeno izdvajanje 1.380.000 KM za subvencije privatnim preduzećima i preduzetnicima. Istovremeno, za poticaje aktivnim mjerama zapošljavanja planira se izdvojiti 690.000 KM. Imajući u vidu programska opredjeljenja Vlade, treba napomenuti i poticaje za zapošljavanje branilaca i članova njihovih porodica u iznosu od 1.575.000 KM.



## Poljoprivreda




Vlada Zeničko-dobojskog kantona nastavlja sa realizacijom programa i projekata u oblasti poljoprivrede. Za te namjene je predviđeno 5,48% od ukupno planiranih tekućih transfera. Tako se za subvencije za poticaj razvoja u poljoprivrednoj proizvodnji planira izdvojiti iznos od 2.500.000 KM što je skoro 1% od ukupnih rashoda (odnosno 3,91% ukupno planiranih tekućih transfera). Istovremeno, Vlada Kantona će Programom uređenja poljoprivrednog zemljišta za 2017. godinu odrediti potrošnju planiranih 1.000.000 KM za projekte koji se finansiraju iz sredstava za pretvaranje poljoprivrednog zemljišta u nepoljoprivredno zemljište.



## Izdvajanja za sport


Postojeći finansijski okvir i zakonom definisane obaveze Zeničko-dobojskog kantona ne ostavljaju mnogo prostora za finansiranje oblasti sporta. Međutim, ipak se za ove namjene planira izdvojiti 1,27% ukupnih planiranih tekućih rashoda i to: 650.000 KM kao tekući transfer za sport, namijenjen u najvećoj mjeri sportskim organizacijama na području Kantona, te 80.000 KM za sufinansiranje sportskih takmičenja RVI i 63.000 KM za zdravstvenu zaštitu sportista.



## Socijalna zaštita i transferi boračkim kategorijama

U cilju zadovoljavanja potreba korisnika usluga socijalne zaštite i održavanja njihovog socijalnog standarda, Vlada Zeničko-dobojskog kantona planira izdvojiti 35.646.700 KM, odnosno 12,17% ukupno planiranih budžetskih rashoda za 2017. godinu.

U sklopu izdvajanja za socijalnu pomoć, najviše se planira izdvojiti za naknade za porodijsko odsustvo, smještaj u ustanove socijalne zaštite, dodatak za djecu, transfer civilnim žrtvama rata, te boračkoj populaciji i njihovim porodicama.



# Ministarstvo za boračka pitanja

Prema Budžetu za 2017. godinu, na Ministarstvo za boračka pitanja Zeničko-dobojskog kantona predviđeno je izdvajanje 9.292.146 KM, odnosno 3,17% ukupno predviđenih rashoda za 2017. Kada posmatramo budžet samog Ministarstva, vidljivo je da se najveći dio njegovih rashoda odnosi na transfere pojedincima.

U sljedećoj tabeli su sumirani svi transferi pojedncima iz ove kategorije stanovništva.

Vrsta transfera iz Budžeta ZDK za 2017. godinu	Iznos (u KM)
Medicinska rehabilitacija	275.000
Stipendiranje studenata-branilaca i članova njihovih porodica	1.650.000
Podizanje nišana/nadgrobnih spomenika šehida/poginulih branilaca i umrlih	14.000
Sredstva za rad branilačkih udruženja	400.000
Ortopedska i druga pomagala	80.000
Sufinansiranje učešća u takmičenjima invalidskog sporta	80.000
Sufinansiranje organizovanja takmičenja i sportskih manifestacija	80.000
Pomoć u rješavanju stambenog pitanja	1.650.000
Pomoć u slučaju smrti branilaca i članova njihovih porodica	500.000
Pomoć braniteljima i članovima njihovih porodica u teškoj socijalno-ekonomskoj situaciji	800.000
Pomoć za liječenje i nabavku lijekova	850.000
Jednokratno novčano primanje osobama sa naročitim zaslugama	10.000
Sredstva za izgradnju spomen obilježja vezanih za odbrambeno-oslobodilački rat	60.000
Pomoć za nabavku udžbenika za redovno obrazovanje	480.000
Transfer za podsticaj zapošljavanju branilaca i članova njihovih porodica	1.575.000
Zdravstvena zaštita neosiguranih lica	160.000
<b>UKUPNO</b>	<b>8.664.000</b>

# Kapitalni transferi i izdaci

Za kapitalne transfere i izdatke planira se izdvajanje 6% od ukupno planiranih rashoda za 2017. godinu.

Najveći kapitalni transferi odnose se na kapitalni transfer za zdravstvo (1.385.000 KM), kapitalni transfer Kantonalnoj upravi civilne zaštite (625.107 KM), te kapitalni tranfer Institutu za zdravlje i sigurnost hrane Zenica (100.000 KM).

Ujedno, Budžetom za 2017. godinu je predviđena nabavka građevina u iznosu od 8.092.000 KM i nabavka opreme u iznosu od 2.761.762 KM. Za rekonstrukciju i investiciono održavanje je predviđen iznos od 4.800.308 KM (za puteve, obrazovne institucije, Kantonalnu upravu za šumarstvo, policiju i pravosuđe, itd.).



**Budžet za građane Zeničko-dobojskog kantona je pojednostavljeni i ilustrovani prikaz određenih dijelova dokumenta Budžet Zeničko-dobojskog kantona.**

**Ovaj jednostavni i ilustrativni izvještaj omogućit će vam da razumijete kako vlast Zeničko-dobojskog kantona za vas i u vaše ime troši novac.**

**Pogledajte i pitajte nas!**

**Podaci za kontakt sa građanima:**

MINISTARSTVO FINANSIJA  
**Nada Delibašić**, pomoćnik ministra  
Broj telefona: 032 460 765; 460 771  
nada.delibasic@zdk.ba

ODSJEK ZA PLANIRANJE I IZVRŠENJE BUDŽETA  
**Nermin Piljug**, šef Odsjeka za planiranje i izvršenje budžeta  
Broj telefona: 032 460 770; 460 771  
min.finansije@zdk.ba

Budžet za građane Zeničko-dobojskog kantona:  
<http://www.zdk.ba/ministarstvo-finansija/itemlist/category/201-budzet-za-gradane>  
Budžet Zeničko-dobojskog kantona:  
<http://www.zdk.ba/budzet/itemlist/category/209-budzet-2017>



Opan  
Society Fund  
Bosnia & Herzegovina



Fond  
otvoreno društvo  
Bosna i Hercegovina

